

孝

經

大

全

孝經大全卷之二十五

明新安呂維祺箋次

表章通考

述文

考

辨

別傳

衍義

心法

孝經考

明仁和朱鴻

謹按漢藝文志及鉤命訣孝經中契孔聖全書年譜宋景濂生卒辯謂孔子七十二以春秋屬商而孝經則以屬參是春秋孝經之成似同斯時也夫魯麟生而春秋作孝經成而

圖文見天人交應理固然者其垂憲萬世宜
矣由魏文侯立傳傳至嬴秦與六籍同燬漢
興惠帝除挾書律孝經自顏貞氏出乃隸書
也故名今文文帝爲置博士司隸有專師制
使天下誦習焉及涼州變令家家習之詔書
詰責武帝時孔壁出孝經皆蝌蚪書也故名
古文光武時令虎賁士習之明帝時令羽林
悉通孝經章句是時不惟天下之經生學士
而家誦戶習遍武人矣况廟號率用孝謚選

士每先孝廉世稱漢治近古殆不誣哉第歷
代表章經籍咸列學官直以此經明顯未令
諸儒會議故經旨未能統一悠悠千載可勝
嘆哉曹魏以後注者無慮百家於是晉永和
及孝武大元間再聚羣臣共論經義迨梁武
帝撰疏十八卷簡文帝撰疏五卷梁昭明唐
壽王及諸胤子皆講於殿庭唐太宗命孔穎
達講於國學是累朝之英君碩輔靡不尊尚
而諸儒之註疏多穿鑿踳駁開元間乃詔羣

臣集議夫玄宗最爲好古篤信是經剪繁蕪撮樞要重加註疏更爲精密書勒國學仍勅家藏學者至今稱石臺孝經云宋太宗有御書孝經仁宗有篆隸二體高宗有真草二刻復詔邢昺杜鎬爲置講義是此經之流播宇內如日中天誠六經之總會百王之衡鑑也夫何王安石以偏拘之學旣以斷爛視春秋而此經亦以淺近見黜夫昔之火於秦也旋復於漢今徒挾司馬公之隙遂使先王至德

要道晦蝕者五百餘年其禍較之秦尤烈矣
洪惟我

明尊號定謚必加孝德於

聖母以端孝之本洪武初會孝經大旨纂爲
御製六言使道人振鐸於路以發孝之端永
樂間命儒臣纂集孝順事實以收孝之實
二祖之教以孝也何啻家至日見哉

列聖相承率循是道胤是嘉靖中興尊崇至
孝超越千古纂明倫一書萬曆庚辰乙酉咸

以此經策士用之掄材今

皇上益篤孝思親御孝經注疏留置展前蓋
欲以風示天下必且進之經筵頒之學官使
得與五經四書並列於世以臻夫豈熙累洽
之盛者端有俟於今日

忠經辨

明仁和朱鴻

經曰事親孝則忠可移於君大學曰孝者所
以事君言忠孝一道也今觀馬融之忠經果
可與孝經並乎其意謂衆善咸起於忠故保

孝行章曰君子行孝必先以忠竭其忠則福
祿至若然則隱居之士終不得以孝其親乎
且於夫子所稱始於事親終於事君之旨悖
矣然融推忠之義甚大故並立二經以補夫
子之缺不知人臣之義莫備於春秋春秋皆
人臣大經大法無將之戒至於誅其意焉其
責人臣純心以盡忠者至矣愚嘗謂孝經立
萬世人子之則春秋嚴萬世人臣之防故夫
子曰吾志在春秋行在孝經是春秋卽夫子

之忠經也故名忠訓以勸人臣作忠則可名
忠經以配孝經則不可故作忠經辨

孝經別傳

明餘姚李槃

夫天地人物大父母也人生天地稱萬物靈
則其父母全而生之也仁者人也故人仁同
天地之種也父母生我此身爲仁固天地之
種吾忍不念父母生身之本忘承順之思而
昧克肖之義與天地不相似矣不可爲人不
可爲子何者爲其不仁也不仁不可以爲孝

也故孝子之道大人君子仁配天地之道也
天子諸侯得此道以稱君公卿大夫士得此
道以稱子故合之謂君子君子之謂大人有
大人之道居大人之位此大人君子也純則
聖及則賢世衰道廢聖賢愚不肖倒置無大
人之道居大人之位不足爲大人君子無大
人之位居大人之道不失爲大人君子非大
人君子爲不肖子不肖子廼不孝大人君子
爲肖子肖子乃孝自有天地而有父母以來

以至於今居大人之位行大人之道立大人
之身若伏羲神農黃帝堯舜禹湯文武之作
君風后力牧皋夔稷契伊傳周召之作臣皆
不過爲肖子則已矣傳至孔子雖嘗試爲大
人而終不得安其位以竟大人君子之施視
其門人炫才博辨如游賜之徒皆日月一至
不能躬行惟顏子聰明沉潛藏於如愚凡終
日與言皆勤於退省獨契博約善發其蘊孔
子知其用行舍藏可與共也問仁而及天下

歸仁問爲邦而談帝王法戒蓋全以大人君子克肖克孝之道授之矣顏淵不幸不存其次唯曾子聰明弘毅藏於朴魯凡教語所傳皆勤於日省獨唯一貫善發其蘊孔子知其任重道遠可與托也故語之以孝皆明王孝治天下君臣上下一德之事蓋非世俗所謂奉養之末也迺仁同天地務其本根一言不忘父母一行不忘父母父母全生子全歸不辱其身不羞其親自生事而葬而祭而行父

母之遺體合孝悌禮樂而一之可以家可以國可以天下本諸身孚諸親及諸祖推諸君加諸民考諸先王建諸天地達諸後世質諸鬼神素位而行成親之善補親之愆終子之身無止息焉大行道彌六合不爲加窮居行修一身不爲損故曰仁者仁此者也禮者履此者也義者宜此者也信者信此者也強者強此者也樂自順此生刑自反此作故曰夫孝置之塞天地溥之橫四海施之後世無朝

夕此孝經之義也立其仁配天地之身是已
曾子得之闡爲大學蓋大人君子之學明明
德於天下不過舉至德要道以順天下耳故
孔子之傳曾子獨得其宗守身事親若曾子
者可也舜之大孝武王周公之達孝曾子臨
深履薄戰兢之孝易地皆然孔子之時也夫
孔子之時也夫

父母生之續莫大焉衍義

明新安吳從周

仁孝一道也仁者人也人得天地生生之理爲心卽爲仁此仁在天地全是一箇生生未有天地此生生之理涵於太始既有天地此生生之理繼續不窮自開闢而來至於今

是一箇生生不絕少有斷續便不生生天地之仁或幾乎息矣父母初生時這天地之仁合畀在吾身上天地生生之理從予繼續得來不有父母生我我從何處繼續得天地之仁來是天地之仁繼續於吾身吾身之仁繼

續於吾心繼續不斷愛敬父母斯爲孝緣父母生我時爲我繼續得天地生生之理在今此生生之理繼續於父母爲孝則孝者所以繼續此天地之仁也繼續此天地之仁全憑父母當初生得此身來故曰續莫大焉此生之仁繼續得來卽爲德卽爲禮是克續於親也移此孝事君則德禮隨在形見是克續於君也苟不愛親而愛他人則愛心斷續德斯悖矣不敬其親而敬他人則敬心斷續禮

斯悖矣蓋此愛敬卽天地之仁原是父母爲
我續得天地來的原是斷續不得的一武隔
斷不接續此心便與父母不相續如何向事
君上繼續得去是故君子言思可道行思可
樂德義可尊作事可法容止可觀進退可度
以臨其民無非繼續此天地生生之仁也無
非孝也無非仁也不爾是父母於天地爲我
續得來我却不能將父母爲我所續的續將
去是自斷其生理也哀哉故凡人思所爲孝

當知此續知此續原於所生則知既生不可
無此續是續也前乎千萬世之既往後乎千
萬世之將來相續不窮則此孝之在人心誠
相續而無間可息者也自吾身續之父母自
父母爲我續之天地自天地續之無始之初
夫既續之於無始當必續之於無終故曰孝
無終始嗟嗟續之爲義大矣哉傳曰天行健
君子以自強不息其庶乎文王純亦不已純
孝之謂也續莫大焉者也

全孝心法

明錢塘虞淳熙

人在氣中如魚在水中父母口鼻通天地之氣子居母腹母呼亦呼母吸亦吸一氣流通已無間隔何況那本靈本覺的乘氣出入又有甚麼界限處可見此身不但是父母的遺體也是天地的遺體又是太虛的遺體保養遺體之法不過馭氣攝靈一事馭氣攝靈不過愛敬二字愛之極爲敬敬之至爲齋齋戒洗心到得浩然之氣塞乎兩間赫然之光照

乎四表方纔是箇全孝方纔叫做孝子這是
極平極易極庸極常的道理如人目能視耳
能聽只把做平易庸常使一生盲聾的人忽
然得此便大驚小怪誇張神異然究竟來只
是箇平易庸常如何添得些子且世上有五
等人孤子義子失怙之子爲人後之子與中
貴人他都恨不得親事父母殊不知此身既
爲太虛天地的遺體難道不是君父繼父繼
母的遺體昔日王祥輩但只一味孝順繼母

就有許多靈感豈是那繼母生下他來至於孤子有乾坤有君師有宗廟隨在皆可盡孝隨在皆有感通這五等人雖無父母得事其實與在膝下一般若肯依着這心法行將去何處不遇本生父母

孝經大全卷之二十六

明新安呂維祺箋次

表章通考

述文

宗旨 引證

孝經宗旨

明南城羅汝芳

問道曰道之爲道不從天降不從地出切近
易見則赤子下胎之初啞啼一聲是也聽着
此一聲啼何等迫切想着此一聲啼多少意
味其時母子骨肉之情毫髮分離不開真是

繼之者善成之者性而直見乎天地之心經
曰此之謂要道

問仁曰孔子云仁者人也蓋仁是天地生生
之大德而吾人從父母一體而分亦純是一
團生意故曰形色天性也惟聖人而後能踐
形踐形卽目明耳聰手恭足重色溫口止使
生機不拂克長條暢人固以仁而立人亦以
人而成人旣成卽孝無不全矣經曰天地之
性人爲貴人之行莫大於孝

問孝何以爲人之本也曰子不思父母生我
千萬劬勞乎未能分毫報也子不思父母望
我千萬高遠乎未能分毫就也思之自然悲
愴生焉疼痛覺焉卽滿腔皆惻隱矣遇人遇
物必能方便慈惠周卹溥濟經曰愛親者不
敢惡於人敬親者不敢慢於人

問學何爲者也曰學爲人也蓋父母之生我
人也人則參三才靈萬物其定分也全生之
則當全歸之故曰立身行道以顯父母夫所

謂立身者負荷綱常發揮事業出則治化天下處則教化萬世經曰夫孝始於事親終於立身

孔孟立教爲天下後世定之極則曰堯舜之道孝弟而已矣後世不察乃謂止舉聖道中之淺近爲言噫天下之理豈有妙於不思而得者乎孝弟之不慮而知卽所謂不思而得也天下之行豈有神於不勉而中者乎孝弟之不學而能卽所謂不勉而中也人能日周

旋於事親從兄之間以涵泳乎良知良能之妙俾此身此道不離於須臾之頃則人皆堯舜之歸而世皆雍熙之化經曰其教不肅而成其政不嚴而治

問孝弟爲教是矣如王祥王覽非不志於孝弟而不與之爲聖何也曰人之所貴者孝弟而孝弟所尤貴者學也故質美未學者爲善人大善人者豈孝弟之不能哉弗學耳弗學則如瞽目行路步或可進尺寸然終是錯違

中正墮落險阻故宗族稱孝鄉黨稱弟而不
善致其良知者則執滯於一節而變或不通
循習於一家而推或不廣矯激於異常而恒
久可繼之道或違又安能光天地塞四海垂
之萬世而無朝夕故君子必學之爲貴也經
曰有覺德行四國順之

問立身行道果何道耶曰大學之道也大學
明德親民止至善如許大事惟立此身蓋丈
夫之所謂身聯屬天下國家而後成者也如

言孝則必老吾老以及人之老天下皆孝而
其孝始成如言弟則必長吾長以及人之長
天下皆弟而其弟始成是則以天下之孝爲
孝方爲大孝以天下之弟爲弟方爲大弟也
經曰教以孝所以敬天下之爲人父教以弟
所以敬天下之爲人兄

友人終日興嘆問其故有一弟而不能化也
曰汝曾擇好友與之處乎曰未也曰此卽便
見汝愛弟未至也夫兄弟手足也若汝手傷

流血則呻吟呼痛求人問藥肯少停時刻哉
此友感悟先生徧呼諸友曰手足且然况君
父乎吾輩有志明時顧乃優游卒歲護持鮮
呻吟之痛而調理無號呼之切徒悼嘆於君
民堯舜之難而治平之不可親見也罪將何
逃經曰進思盡忠退思補過將順其美匡救
其惡故上下能相親

宗也者所以合族人之渙而統其同者也吾
人之生只是一身及分之而爲子姓又分之

而爲曾玄分久而益衆焉則爲九族至是各
父其父各子其子更不知其初爲一人之身
也故聖人立爲宗法以統而合之董子曰道
之大原出於天天之爲命本只一理今生爲
人爲物其分甚衆比之一族又萬萬不同矣
苟非聖賢有箇宗旨以聯屬而統率之寧不
愈遠而愈迷亂也哉於是苦心極力說出一
箇良知指在赤子孩提處見之夫赤子孩提
其真體去天不遠世上一切智巧心力都着

不得分毫然其愛親敬長之意自然而生自然而切蓋盡四海九州之千人萬人而其心性渾然只是一箇天命雖欲離之而不可離雖欲分之而不可分如木之許多枝葉而貫以一本如水之許多流派而出自一源其與人家宗法正是一樣意思蓋宗法者是欲後世子孫知得千身萬身只是一身聖賢宗旨是欲後世學者知得千心萬心只是一心四書五經中無限說中說和說精說明說仁說

幾千萬箇道理也只是表出這一箇體段前
聖後聖無限立極立誠主敬主靜致虛致一
千萬箇工夫也只是涵養這一箇本來往古
來今無限經綸宰制輔相裁成底績運化千
萬箇作用事業也只是了結這一箇志願若
人於這一箇不得歸着則縱言道理終成邪
說縱做工夫終成誠行縱經營事業亦終成
霸功與原來不慮而知不學而能天然不變
之體又何啻霄壤也哉如人家子孫衆多各

開門戶各立藩籬無宗以統而一之其不至
於相戕相賊而流蕩無歸者無幾經曰夫孝
德之本也教之所由生此之謂也

孝經引證

明嶺南楊起元

孝之爲貴貴能立身行道永光厥祀若匍匐
懷袖日用三牲而不能令萬物尊已舉世我
賴以之養親其榮近矣經曰孝莫大於嚴父
嚴父莫大於配天

凡人事天地鬼神莫若孝其二親二親最神

也孝至於天日月爲之明孝至於地萬物爲
之生孝至於民王道爲之成經曰孝弟之至
通於神明光於四海無所不通

子路見孔子曰負重道遠不擇地而休家貧
親老不擇祿而仕昔者由事二親之時常食
藜藿之食而爲親負米百里之外親沒之後
南遊於楚從車百乘積粟萬鍾累茵而坐列
鼎而食願食藜藿爲親負米不可復得也枯
魚嚼索幾何不蠹二親之壽忽如過隙草木

欲長霜露不使人子欲養二親不待孔子曰
由也事親可謂生事盡力死事盡思者也經
曰生事愛敬死事哀戚

呂維祺曰孝經一書通神明和上下格
天地達四海前乎千萬世之既往後乎
千萬世之將來無所不通信孔曾授受
之蘊吾道一貫之精也惜羸煨作而經
殘教潰歷代君臣好尚靡定聖學罔聞
遂至諸儒紛紛各售已見分立門戶考

索異同雖然諸儒之闡經翼聖薪盡火
傳使聖遠言湮之餘猶得見聖人之遺
書而足以興起斯文者諸儒之言胡可
盡沒也故以述文次第之曰序曰跋曰
論曰說曰解曰考曰辨曰別傳曰衍義
曰心法而文之變盡矣然有敘事之文
有闡道之文有廣義之文至於羅氏宗
旨楊氏引證亦採數則附諸述文之末
在觀者潛泳而自得焉

孝經大全卷之二十六引訓

孝經大全卷之二十六終

孝經大全卷之二十七

明新安呂維祺箋次

表章通考

紀事

漢文帝置孝經博士司隸有專師制使天下
人人誦習

漢平帝元始三年令序庠置孝經師一人五
年令天下通知孝經教授者所在以聞遺諸
京師

東漢光武帝表章孝經行沛王通論

又光武帝令虎賁士俱習孝經

漢顯宗明帝時自期門羽林之士悉令通孝經章句當時甘露降於甘陵仍降附樹枝芝草生殿前神雀五色翔集京師西南有哀牢僭耳僬僥槃木白狼動黏諸種前後慕義貢獻亦或有遣子入學吏稱其官民安其業遠近肅服戶口滋植焉

晉元帝太興初置孝經鄭氏博士一人愍帝

崩斬衰居廬太陽陵毀素服哭三日時玉冊
見于臨安白玉麒麟神璽出于江寧日有重
暈竟全吳楚中興晉室其作孝經傳序曰天
經地義聖人不加原始要終莫踰孝道能使
甘泉自涌鄰火不焚地出黃金天降神女感
通之至良有可稱

晉穆帝永和十二年二月帝講孝經升平元
年三月又講孝經親釋奠于中堂

隋志梁武帝義疏十八卷梁簡文帝孝經註

五卷按梁武帝釋孝經義中大通四年三月
置制旨孝經助教一人簡文于士林館發孝
經題張譏論義往復譏有孝經義八卷

齊書明太子講孝經殿中中庶子徐勉祭
酒張克執經天監八年九月於壽安殿講孝
經論語講畢親臨釋奠於國學

隋文帝親臨釋奠頒賜孝經

唐太宗貞觀十四年帝詔國子監釋奠命祭
酒孔穎達講孝經講畢有詔褒美至屯營飛

騎亦授以經是年野蠶繭大如柰其色綠凡收八千三百碩十八年引沂鄆諸州所舉孝廉賜坐於御前皇太子問以曾參說孝經並不能答太宗謂曰朕發詔徵天下俊異纔以淺近問之咸不能答海內賢哲將無其人耶朕甚憂之二十年命趙弘智攝司業爲終獻旣而就講弘智談孝經忠臣孝子之義許敬宗上四言詩以美其事是年玉華宮李樹連理隔澗合枝又有黃雲澗一丈東西際天

唐史孔穎達傳太宗時穎達爲太子右庶子
數諍太子承乾過失撰孝經章句因文以盡
箴諷帝悅賜黃金綵絹久之拜祭酒仍充東
宮侍講

唐高宗永徽初召趙弘智爲陳王師講孝經
百福殿頗耽墳典方欲以德教加於百姓刑
於四海乃令陳孝經大要以補不逮對曰天
子有爭臣七人雖無道不失其天下願以此
獻帝悅賜絹疋名馬故永徽之治庶幾貞觀

云

唐玄宗御製孝經制旨一卷取王肅劉劭虞
翻韋昭劉炫陸澄六家之說叅攷孔鄭舊義
今行於太學開元十年六月二日上注孝經
成頒天下及國子學生天寶二年五月二十
二日上重注亦頒天下天寶三載十二月癸
丑詔天下家藏孝經按會要云精勤教習學
校之中倍加傳授州縣官長申勸課焉五載
二月二十四日詔孝經書疏雖粗發明未能

該備今更敷暢以廣闕文令集賢寫頒中外
唐玄宗八分書孝經立國學以層樓覆之壽
王通孝經賜王迥質束帛酒饌命元行冲爲
疏立於學官開元時凡童子科十歲以下能
通一經及孝經每卷誦文十通者予官通七
子出身天寶十一載明經所試一大經及孝
經各有差

開元時趙匡爲澤州刺史上舉人條例謂孝
經德之本學者所宜先習其明經以論語孝

經爲之翼助又謂論語孝經爲一經舉旣立
差等隨等授官則人知勸勉又謂進士亦請
令習孝經其有通禮記尚書論語孝經之外
兼有諸子之學爲茂才舉又謂簡試之時請
皆令習孝經論語其孝經口問五道論語口
問十道須問答精熟知其義理並須通八道
以上行之

玄宗爲太子褚無量擢明經官侍讀釋奠日
講孝經隨端建義博敏而辨觀者嘆服進銀

青光祿大夫賜以章服綵絹

唐代宗廣德元年禮部侍郎楊綰請依古察孝廉而所習取大義能通諸家之學論語孝經孟子兼爲一經李栖筠等議稱綰所請實爲正論詔行之

唐穆宗時韋處厚路隋擬孝經爲法言帝稱善並賜金幣

于公異旣位不歸省後母詔賜孝經

唐制學生以品官子孫爲之凡治孝經論語

其限一歲試通者爲第

唐王元感上所撰孝經藁草詔諸儒公議可
否魏知古見其書嘆曰信可爲指南矣徐堅
劉知幾張思敬等嘉其異聞每爲助理聯疏
薦之遂下詔褒美拜崇賢館學士

唐至德中徐孝克通孝經有講疏六卷帝命
太子入學發孝經題詔太子北面聽講尚書
省第舊多怪孝克居兩載妖變皆息

薛放對穆宗曰孝經者人倫之大本自漢首

列學官今復親爲註解當時四海大理蓋人
知孝慈氣感和樂之所致也穆宗曰聖人以
爲至德要道信其然乎

宋太宗賜李至御書千文至謂理無足取莫
若孝經有資治化仍御書以賜時孝經疏板
未備至乞讐校以備刊刻詔從之

宋真宗咸平三年勾中正受詔以三體書孝
經摹石表上之召見便殿賜坐嘉歎良久賜
金紫命藏於秘閣

咸平三年三月癸巳命國子祭酒邢昺等校
定周禮儀禮公羊穀梁傳正義又重定孝經
論語爾雅正義四年九月丁亥翰林侍講學
士邢昺等及直講崔偓佺表上重校定周禮
儀禮公穀傳孝經論語爾雅七經疏義凡一
百六十五卷賜宴國子監昺加一階餘遷秩
十月九日命摹印頒行於是九經疏義具矣
又祥符間講孝經資善堂

宋仁宗命王洙書孝經四章楊安國請書後

屏帝不欲背聖人之言令列置左右天聖景祐至和嘉祐年間壽星凡十五見主人君壽昌天下安寧賢士進用四十二年深仁厚澤升遐之日雖深山窮谷莫不奔走悲號而不能止謚孝明皇帝

皇祐四年命丁度書孝經天子孝治聖治廣至德要道四章爲圖

嘉祐二年增設明經試法兼以論語孝經策時務三條出身與進士等

崔遵度七歲好學仁宗開壽春王府拜爲王友授王孝經賜御詩寵之

仁宗命國子監取易詩書周禮禮記春秋孝經爲篆隸二體刻石兩楹至和二年三月五日判國子監王洙言國子監刊立石經至今一十五年止孝經刊畢尚書論語見書鐫未就乞促近限畢工餘經權罷從之

嘉祐中蜀人龍昌期注孝經詔取其書野服自詣京師賜緋魚并絹百疋

又天聖四年閏五月侍讀學士宋綬錄惟皇
誠德賦孝經論語要言唐太宗帝範二卷楊
浚聖典三卷楊相如君臣政理論三卷以進
時帝好儒學太后命綬擇前代文字資孝養
補政治者以備帝覽故也慶曆七年三月丙
申邇英講孝經

宋哲宗元祐二年九月庚午呂公著言伏觀
今月十五日以經筵講論語畢賜執政及講
筵官御筵是日內出御書唐賢律詩分賜臣

等各一篇次日臣於延和謝今以論語終帙
進講尚書二書皆聖人之格言爲君之要道
臣輒於尚書論語及孝經中節取要語凡一
百段惟取明白於治道者庶便省覽他日宣
諭公著曰所進尚書論語孝經等要義百篇
書寫看覽甚有益學問與寫詩不同

又元祐二年尚書省言欲加試論語孝經大
義仍裁半額注官並依科目次序詔近臣集
議以聞

孝經大全卷之二 一 宋高宗紹興二年高宗出所寫孝經宣示呂
頤浩等九年宰臣乞以御書真草孝經刻之
金石上曰十八章世以爲童蒙之書不知聖
人精微之學不出乎此十四年詔諸州以御
書孝經刊石賜見任官及學生

紹興中王忬獻孝經解義詔賜粟帛

宋孝宗淳熙二年下禮部太常議明堂大禮
初李仁父主此說於前郊會近習楊言李
博極群書却不曾讀孝經乃不果行夫不讀

孝經而誤大議徒博何益今年童子科凡全
誦六經孝經語孟爲上等與推恩

呂維祺曰紀事者雜紀漢唐宋諸朝所
表章孝經之事也蓋孔子作孝經本爲
明王以孝治天下而發非獨爲興文課士之
講習而已然而三代以下猶知尊崇此
經列爲九經之一以頒之學官或置博士
助教或令虎賁羽林俱誦孝經或選
吏舉孝廉或刊石兩楹或頒賜近臣或

命儒臣講於太學講於殿廷或親爲註
釋御書刻石或以孝經出身與進士等
紀其事尚足以膾炙人口生色簡編况
實舉而躬行於上教民於下者乎是所
望於今日耳陶潛曰文王孝道光大自
近至遠故得萬國之懽心以事先王知
言哉

孝經大全卷之二十八

明新安呂維祺箋次

表章通考

識餘

家語後序孔安國考論古今文字爲古今論語訓十一篇孝經傳二篇尚書傳五十八篇皆所得壁中蝌蚪本也又集錄孔子家語四十四篇

獻王輔光武子好經書善說京氏易孝經論

語傳及圖讖作五經論時號曰沛王通論

漢六藝志序六藝爲九種易十三家二百九十四篇書九家四百十二篇詩六家四百十六篇禮十三家五百五十五篇樂六家百六十五篇春秋二十三家九百四十八篇論語十二家二百二十九篇孝經十一家五十九篇小學十家自史籀至杜林蒼頡三十五篇漢祭祀志注蔡邕明堂論曰魏文侯孝經傳曰太學者中學明堂之位也

漢藝文志孝經十一家五十九篇古孔氏一篇二十二章孝經一篇十八章長孫氏說二篇江氏翼氏后氏說各一篇雜傳四篇安昌侯說一篇五經雜義十八篇石渠論爾雅三卷二十篇小爾雅一篇古今字一卷弟子職一篇說三篇

漢孝經置孝經博士司隸有孝經師荀爽對策漢火德其德爲孝漢制使天下誦孝經選吏舉孝廉

王肅傳奉詔令諸儒注述孝經以肅說爲長
唐會要劉子玄云王肅孝經傳首有司馬宣
王之奏奉詔令諸儒注述孝經以肅說爲長
隋志梁有孝經圖一卷孝經孔子圖二卷舊
唐志孝經應瑞圖一卷識緯有孝經古秘圖
一卷左右契圖一卷分野圖一卷內事圖二
卷內事星宿講堂七十二弟子圖一卷又口
授圖一卷崇文目農家大農孝經一卷
唐志經錄孝經二十七家三十六部八十二

卷失姓名一家始於古文孔安國傳終於元
行冲疏古文有孔安國之傳劉邵之注爲注
者王肅鄭玄韋昭孫熙蘇林謝萬虞盤佐虞
翻殷仲文叔道徐整袁克巳而唐玄宗制旨
附焉爲講義義疏者車胤皇侃何約之梁武
帝劉炫賈公彥任希古元行冲而荀勗集解
太史叔明發題張士儒以孝經附焉應瑞圖
一卷失姓名不著錄六家一十三卷尹知章
王元感之注孔穎達之義疏李嗣真之指要

及平貞督孝經義終於徐浩廣孝經隋志古
今孝經等十八部六十三卷崇文目五部九
卷中興目十五家二十卷續目一家一卷

唐志任希古越王孝經新義十卷後周顯德
六年八月高麗遣使進別敘孝經一卷越王
新義孝經八卷別敘者記孔子所生及弟子
從學之事新義以越王爲問目釋疏文是非
李陽冰子服之貞元中授韓愈以其家蝌蚪
孝經又渭上耕者亦得古文孝經

西山真德秀跋鄭居士孝經圖曰自先正司馬公作孝經指解學者始得見此經舊文然誦而習之者蓋鮮况能服而行之者乎居士鄭公居其父喪時手抄此經遵守惟謹可謂篤志力行之士方其落筆時用紙蓋不暇精擇此豈有意於傳哉距今八十有五年蠹蝕之餘墨色如新使人捧玩起敬爲善之不可揜類若此

范陽張九成曰李伯時畫超然塵世之外其

精緻微密處幾與造化爭衡豈凡流所可彷彿猶恨其不深攷孝經微意其間不無可議者此君子所以爲之深惜也

玉山汪應辰曰漢石建以馴行孝謹爲齊相國齊國慕其孝行而治此所謂居家理故治可移於官也况於聖人乎伯時畫此章乃微纒析揚纍纍然者何也

朱文公曰熹伏讀范陽玉山二先生跋龍眠孝經圖語有以見有道君子心目之間無非

至理非如好事者徒議工拙於筆墨間也拜
謁玉山先生墓下公子達出示此卷不勝涕
感因敬書于其後

石淙楊一清曰唐宋人圖孝經者無慮數十
家各臻其妙此風教中事非其他圖畫鬼神
仙佛及花木竹石禽魚矜奇衒麗玩物適情
者之比大邦侯張公藏是卷間以示予圖不
必工而摹寫出君臣父子俯仰升降瞻拱拜
揖之狀藹然可掬志存乎勸忠勵孝匪直爲

觀美而已也披閱之餘書此以復

廬陵郭子章曰劉中壘較定傳數千禩子朱
始刪詩爲經餘改爲傳不佞謂戰戰兢兢
詩實孝經大旨曾子易簣之語曰啓予足
啓予手詩云戰戰兢兢如臨深淵如履薄冰
而今而後吾知免夫非謂免於毀傷也謂平
生戰兢至疾革始免卽仁以爲己任死而後
已也

李維楨曰孝經孔子與曾子燕居所論說遭

秦焚書河間人顏芝藏於屋壁至漢而其子
貞出之凡十有八章長孫江翁后倉翼奉張
禹傳之是曰今文及魯共王壞孔子宅得蝌
蚪書二十有二章孔安國解之是曰古文劉
向較讐以十八章爲定至唐玄宗采註六家
其章句悉準子政氏及宋考亭夫子作刊誤
裁爲經一傳十四若曰是古文云爾或曰劉
炫廣作夫經之爲言常也今石臺文具存醇
粹簡切古文雖亾卽今之文固自不害其爲

經奈何黨同伐異呶呶聚訟

仁和張瀚曰孝經五常之本百行之源所謂
布帛菽粟人舍是無以資生仁義道德士舍
是無以爲學天下國家舍是無以施政教臻
化理

仁和沈淮曰大哉孝經其先聖之微言乎孔
子刪述六經匡持理道參贊化育詳且悉矣
又慮夫天下後世求派遺源而不知大經大
法之要故諄諄曾氏發明孝行示天下後世

治平之準萬化之源又曰王安石與司馬攢
隙因其崇尚古文遂挾私論廢而不用聖人
孝治之意遽爾湮泯

虞淳熙曰孝經自魏文侯而下唐宋傳之者
百家九十九部二百二卷由元迄今益又多
矣又曰窮經者師其義乎師其詞乎如以詞
而已矣則宜辨不則無如會其大旨見諸行
事之深切著明也後之君子無泥從今之語
復致紛紜

朱鴻曰漢世近古孝經居九經之一嘗列學
官置博士雖羽林武臣明帝皆令通習之延
及宋初亦得附試明經自王安石變新經義
始不以取士是時孝經爲廢滅餘編程夫子
詳看武學之制猶欲與論語孟子並行於世
使人皆知義理又曰後世又有疑孝經有意
何教人處多而躬行處少不知夫子之傳經
意尤重於爲人上者蓋上之人躬行其教則
下之人自率而化之矣豈待家諭戶曉而後

可以明孝哉

清源蘇濬曰余觀孝經中契謂陽衢乘紫麟
下告地主要道之君後年麟至口吐圖文竊
疑其爲怪誕不足徵之詞然孔子嘗曰吾志
在春秋行在孝經春秋成而麟出孝經成而
圖文見何足怪也

錢塘孫本曰孝經起自仲尼閒居迄於孝子
之事親終矣統爲一篇按漢藝文志首稱孝
經古孔氏一篇可徵也乃孔子口授曾子一

時問答之語夫子之心直欲以孝治天下而此篇則備述其所以治世之具也觀夫子嘗曰吾其爲東周乎又曰期月而可三年有成豈漫言以誇人哉誠恃其治天下有此具也然則謂之經者以爲古先聖王治天下之常道大抵爲後世王者告也

呂維祺曰孔子孝經一篇其言如驪珠盛於玉盤秋蟬懸於晴空綠萍結於春汴雖活潑照徹聚散不可拘執模擬而

圓融之體貞明之質完合之勢固自如
耳後之學者紛紛各爲之說而經愈晦
不知孝經分殊而理一用大而體約雖
有五等三才始終常變之異而其要歸
不過一性天盡之其旨趣不過一孝治
盡之今旣箋次節略大全及孔曾言行
先儒尚論歷代表章諸卷幾於大備庶
於孔曾論孝之旨帝王孝治之道爛然
具矣識餘數十條則復簡筭中所遺稿

孝經大全卷之二十八
猶足以稱述訂證者以備學者之參考
焉

孝經大全卷之二十八

終

附詩

附孝經詩

呂維祺撰

崇禎乙亥元

日孝經本義成箋次大全作

圖說恭紀

我后崇禎之八載春王正月歲之元風微日
澹寒雲薄地義天經孝道尊祿閣老藜存聖
諦留曹閒筆總君恩圖書告備慚才淺欲問
真傳不得言

自從堯舜至於今談道紛紛衆若林誰識孝
爲天地性吾因經見孔曾心神明四海其源

遠兢戰三言厥旨深却是見前平易事多人
踏破鐵鞵尋

諸儒言孝在承歡曾作明王德教看泗水應
遺周禮樂期門猶想漢衣冠二千餘載真宗
孤五百多年廢學官天子方思興至理獨無
孤柱可廻瀾

日來連上侍親書陶徑全荒萊綵虛北斗孤
懸黃玉幻西山遙望白雲疎爭言魯壁藏蝌
蚪耻撥秦灰問蠹魚此意與人談不得橫經

春在五辛餘

戊寅元日復訂孝經本義大全作序例孔
曾論孝等卷成又紀

閒卧深山石隱居辛觴應是聖恩餘時情冷
煖爭迎歲日課陰晴愛擁書半世窮經知是
否千年言孝竟何如憑誰細問春消息窻草
盆梅爲起予

椒盤栢酒俗相沿冬去春來亦偶然浮世光
陰如一瞬真傳今古竟誰肩東風始起堯階

葉北斗長留孔壁篇時輩不知人意思爭謚
閉戶草楊玄

孔門洙泗總斷斷傳孝獨於曾子云自古人
皆存至性祇今天未喪斯文心疑見處還非
我手欲拈來說與君畢竟通神光海訣其中
消息迥難聞

薪傳千古問遺經絕學諸儒見未曾堯舜可
爲惟孝弟孔曾相授只淵冰幸留斯道微言
在合有明王應運興想像東周真事業誰當

執此答升恒

已卯九月十七日進呈孝經有旨謂有裨
治理命所司較正詳備具奏喜而賦此
孔壁遺經久在茲微言傳後更傳誰漢唐課
士猶虛典今古通儒尚妄疑闢地開天歸聖
主崇文重道恰明時豈應千載渾埋沒一日
絲綸萬國知

謂訓蒙書世盡云誰知治理裨斯文天顏展
閱臣鄰喜御筆親批較備聞久矣孔曾傳此

道都哉堯舜見吾君還期早奏明王事穩卧
東山老白雲